

Na osnovu člana 18. stav (4) Zakona o budžetu institucija Bosne i Hercegovine i međunarodnih obaveza BiH za 2025. godinu („Službeni glasnik BiH“, broj: 70/25), člana 32. stav (1) tačka i) Poslovnika o radu Predsjedništva BiH („Službeni glasnik BiH“, broj: 10/13, 32/13, 22/14 i 54/24), Predsjedništvo Bosne i Hercegovine, na 166. vanrednoj sjednici, održanoj 3. decembra 2025. godine usvojilo je

**PRAVILNIK
O DODJELI SREDSTAVA INTERVENTNE TEKUĆE REZERVE
ZA 2025. GODINU**

Član 1.

(Predmet Pravilnika)

Ovim pravilnikom o dodjeli sredstava interventne tekuće rezerve (u daljem tekstu: Pravilnik) uređuje se način, postupak i kriteriji za dodjelu sredstava interventne tekuće rezerve ustupljenih Predsjedništvu Bosne i Hercegovine (u daljem tekstu: Predsjedništvo) prema Zakonu o budžetu institucija Bosne i Hercegovine i međunarodnih obaveza Bosne i Hercegovine za 2025. godinu (u daljem tekstu: Zakon), kao i druga pitanja koja se tiču ovih sredstava.

Član 2.

(Visina sredstava interventne tekuće rezerve)

Sredstva interventne tekuće rezerve u iznosu od 1.080.000,00 KM, (u daljem tekstu: sredstva) dodjeljuju članovi Predsjedništva BiH, i to u jednakim omjerima - svaki u iznosu od 360.000,00 KM, prema namjenama i svrsi, kako je utvrđeno ovim pravilnikom.

Član 3.

(Odluka o kriterijima)

Članovi Predsjedništva donijet će pojedinačne odluke o kriterijima za dodjelu sredstava interventne tekuće rezerve, u skladu sa ovim pravilnikom.

Član 4.

(Korisnici sredstava)

- (1) Sredstva interventne tekuće rezerve dodjeljuju se fizičkim i pravnim licima u Bosni i Hercegovini koja iskažu potrebu za tim na način opisan u ovom članu.
- (2) Lica iz stava (1) ovog člana potražuju sredstva interventne tekuće rezerve podnošenjem pisanog zahtjeva ili molbe članu Predsjedništva, sa izraženom namjenom i svrhom utroška ovih sredstava.
- (3) Uz pisani zahtjev iz stava (2) ovog člana prilaže se i prateća dokumentacija koja dokazuje osnovanost zahtjeva.

Član 5.
(Dodjela sredstava)

(1) Na osnovu dostavljenog zahtjeva ili molbe iz člana 4. stav (2) ovog pravilnika, član Predsjedništva donosi posebnu odluku o korištenju sredstava interventne tekuće rezerve, ukoliko zahtjev ili molbu odobri, u skladu sa kriterijima propisanim u stavu (4) ovog člana, ukoliko je odluka sačinjena.

(2) U odluci iz stava (1) ovog člana navodi se fizičko lice/pravno lice kojem se dodjeljuju sredstva interventne tekuće rezerve, iznos i namjena dodijeljenih sredstava.

(3) Subjekt realizacije kabinetskih odluka o dodjeli interventnih sredstava, tj. odluka članova Predsjedništva je Sekretarijat Predsjedništva.

(4) Kriteriji za dodjelu sredstava interventne tekuće rezerve su: humanitarne potrebe, podrška obrazovanju, razvoju duhovnosti, razvoju kulturnog stvaralaštva i sporta, podrška nevladinom sektoru, kao i druge namjene.

(5) Korisnik sredstava interventne tekuće rezerve dužan je članu Predsjedništva dostaviti izvještaj o utrošku sredstava.

Član 6.
(Objavljivanje odluke)

Odluka iz člana 5. stav (1) ovog pravilnika objavljuje se u „Službenom glasniku BiH“ u roku od deset dana od dana donošenja.

Član 7.
(Pregled odluka)

Sekretarijat Predsjedništva BiH periodično priprema pregled odluka o dodijeljenim sredstvima interventne tekuće rezerve i o tome informiše članove Predsjedništva BiH na sjednici.

Član 8.
(Prestanak važenja)

Stupanjem na snagu ovog pravilnika, prestaje da važi Pravilnik o korištenju interventne tekuće rezerve za vrijeme privremenog finansiranja institucija Bosne i Hercegovine u periodu januar-mart 2025. godine, broj: 01-50-1-168-42/25, od 3. februara 2025. godine.

Član 9.
(Stupanje na snagu)

Ovaj pravilnik stupa na snagu danom donošenja.

Broj: 01-50-1-3020-4/25
Sarajevo, 3. decembra 2025. godine

